



# Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma : Tir Yimym

tiryimym@aolima

tir yimym

TAPAK 7

**May 10 sülen India nunger sepai ka danga linük nung malitsü: Maldives Tir**

**US-i Zimbabwe Tir Emmerson Mnangagwa nem tenokdangba agütsür**

VOL. XXI ISSUE NO. 143 (ADOK 143) DIMAPUR RASEMNÜ (WEDNESDAY) METSÜREMI (MARCH) 06, 2024 ₹ 5.00

## JD(U) Nagaland-i Dr. Chumben Murry yaritsü

**Dimapur, March 5, 2024 (TYO):** Taküm Lok Sabha elections nung Janata Dal (United) Nagaland State Unit-i Dr. Chumben Murry yaritsü metetdaksügo.

Dr. Chumben ya NDPP candidate lir aser Centre nung Prime Minister Narendra Modi lenisüba kübok NDA sorkar nung shilem ka lir ta JD(U) Nagaland State Unit-i metetdaksü.

JD(U) National President aser Bihar Chief Minister Nitish Kumar lenisüba kübok JD(U)-i National Democratic Alliance

(NDA) nung tongti shilem agir ta parnokshi.

"Nagaland legislative assembly nung ozü MLA Jwenga Seb den jembitepba sülen onoki Dr. Chumben Murry yaritsü lemtetogo" ta President JDU Nagaland NSN Lotha aser General Secretary Insumongba Pongen nati sangdong ka nung ashi.

Onoki NDPP asr BJP dang Nagaland state atema tongtipang lemtetem agidang NDA külem tangatetba nung noktaksü mepishir ta JD(U) Nagaland State Unit-isa ashi.

## Western Sumi Hoho-i DCCI pusema nungiter

**Dimapur, March 5, 2024 (TYO):** Dimapur nung Naga national political groups balalai tax saruba aser timtem agütsüba atema Dimapur Chamber of Commerce and Industry (DCCI)-i tawa sangdong ka agütsüba pusema nungiter ta Western Sumi Hoho (WSH)-i metetdaksü.

Naga political groups balalai shishilebartem dang tax aika saruba ajanga Dimapur nung shishilembabaren tejakleni mouteter ta WSH-i ashi.

"Tanen makai tax saruba, amokmerenba aser jaokba inyakyim manenra DCCI-i mapang telatet makai dokantem

shibangsü ashibaji kanga tim. Tax talitabong saruba ya Dimapur nung rongsenketzüng aser shishilembabaren asoshi khuret tulu ka lir anungji mapa inyaksüla" ta Media Cell, Western Sumi Hoho sangdong ka nung ashi.

WSH-isa bangdak ketdangpurtem aser Naga political groups külemi iba tebilemtsü koktettsü aser Dimapur nung shishilebartem kümzüka ayutsü atema ayongzükogo.

"Onoki DCCI aser shishilebartem den külemi noktaker aser tax onsara saruba aser timtem agütsüba anentsü metetdaksür" ta WSH-isa ashi.

## Arunachal nung JJM 100% inyakogo

**Itanagar, March 5, 2024 (Agencies):** Northeast region nung Jal Jeevan Mission (JJM) 100% mezüng inyaktetbaji Arunachal Pradesh lir.

Iba ajanga Arunachal Pradesh ya India nung JJM maparen noklang nung noklang inyaktetba state 10 buba kümogo.

Jal Jeevan Mission takok ngua inyaktetba atema State Public Health Engineering Department (PHED) nem tenüngsang agütsür ta Arunachal Pradesh chief minister Pema Khandu-i metetdaksü.

Jal Jeevan Mission ya Centre sorkari 2019 küm tenzükba

sentong ka lir.

"2019 küm Prime Minister Modi-i JJM tenzüksüba sülen mezüng nungbo Arunachal Pradesh nung kilen 20,989 nung dang Functional Household Tap Connections (FHTCs) liasü" ta CM Khandu-i ashi.

Ajisüaka iba mission takok ngua inyakba ajanga tangbo kilen lakh 2.9 nung FHTCs lir, ta pai ashi.

JJM den külemi Arunachal Jal Sakti Yojana (AJSY) mapa inyakba ajanga kilen shia nem potable tap water connections agütsütetogo ta CM Khandu-isa ashi.

## Manipur sorkari hypertension ajanga asür kibongtem yaritsü

**Imphal, March 5, 2024 (Agencies):** Manipur nung kin o kin tsüngda raradang hypertension ajanga asür kibongtem nem state sorkari teyari agütsütsü ta Chief Minister N Biren Singh-i Mongulbar metetdaksü.

Assembly session nung opposition Congress MLA Kangujam Ranjit-i Sugnu yimtsüng nung teintet rogo 5 asüba atema tebilemba lemsatetpang CM Biren-i iba

osang metetdaksü.

Taküm February 14 aser 23 anogotem telungpurtemi bomb pokdakja aser injang khalokja amakdang nisung pungu tashi high blood pressure ajanga asü.

Chief Minister Biren-i district commissioner tem dang ibala mesükba tatalokbatem osang bendentsü tetuyuba agütsü.

Mepetmesü mapang hypertension ajanga asüba kibongtem nem sorkari teyari agütsütsü ta paisa nenshia ashi.

## Governor La Ganesan-i NABARD State Credit Seminar nung aden



Hotel De Oriental Grand, Kohima nung NABARD-i ayongba State Credit Seminar nung Governor La Ganesan-i State Focus Paper 2024-25 sayatsüdang agiba noksa ka angur.

**Kohima, March 5, 2024 (PRO Raj Bhavan):** NABARD ajanga ayongzükba State Credit Seminar nung Nagaland Governor La Ganesan-i tetushi süa jaoker ka ama shilem agiogo.

March 5, 2024 nü Hotel de Oriental Grand, Kohima nung agiba sentong nung Governor-i NABARD Rural Mart Scheme kübok mobile van ka sayatsü.

Nagaland nung kanga dang meranga inyakba aluyimertemi linük food security atema shilem tajung agir ta Governor Ganesan-i ashi.

"Sen aputsüba ajanga aluyimba maparen tuluba inyakba dang masü saka secondary activities aser enterprises yarir. Asen aluyimertemi nungdakba peritsütsü atema sen aputsüba ajanga parnok tashitaitba kümdaksür aser asenoki asen yimtsüngtem nung lokti-rongsenketzüng ajungkettsü atema yariteptsüla" ta pai ashi.

"NABARD-i RBI guidelines aser Nagaland sorkar den asüngdangtepa mapa tajung inyaksüla. NABARD-i infrastructure, self-help groups,

joint liability groups, farmers' clubs nem sen aputsüba atema tenüngsang agütsür aser NABARD, tanga banks aser financial institutions ajanga state sorkar den külemi aluyimba maparen nung senotsü tashi itdaksütsüla" ta Ganesan-isa metetdaksü.

"Governor La Ganesan-i Seminar nung shilem agiba atema pelar. 1982 küm NABARD tenzükba sülen aluyimba maparen aser yimtsüngtem nung azükarua lidaksütsü atema sen apuja arur" ta CGM/OIC, NABARD Tiakala-isa ashi.

NABARD ajanga Consultancy, Start Ups nem Venture Capital funding, Green Financing, social infrastructure aser yimtsüngtem nung tanga maparen aika inyaka arur ta lai ashi.

Tourism, horticulture, handloom & handicraft aser MSME sector tem ajanga Nagaland atema tajangzük bentsür arutsü lenmang lir. Iba atema state sorkari Banks den yaritepa state nung terenlok bener arutsüla ta Tiakala-isa metetdaksü.

State sorkar Department tem tashi itdaksütsü atema NABARD-i FY 2023-24 nung infrastructure, investment, refinance, developmental aser promotional activities tashi itdaksütsü atema Rs 90.00 crore tema agütsügo aser Nagaland sorkar teyari maneni nungdaker, ta CGM Tiakala-isa ashi.

Iba sentong nung Principal Secretary, Department of Finance, GoN Taliremba-ia Agricultural-allied sectors ajanga mapa inyaktetba osang lemsatet. Sentong nungsa Governor Ganesan-i State Focus Paper 2024-25 aser Rural Haats indang film tatsü ka sayatsü.

Paisa mapa tajung inyakba SHGs/JLGs aser banks nem sempettem agütsü aser NABARD sponsored project atema sanctioned letters lema agütsü.

Convenor, SLBG Nagaland Surabh Bhattacharjee, GM/OIC, RBI Nagaland Paresch Chauhan, Soyhun Tep, Vice Chairman Zunpha MPCs Ltd. under Tseminyu District aser Senior program officer Nagato Aye nungeria o jembi.

## Frontier Nagaland atema ENPO-i 'public emergency' sangdonger

**Dimapur, March 5, 2024 (Agencies):** India sorkari Frontier Naga Territory tenteta aotsü mapa atsülangba atema Eastern Nagaland People's Organisation (ENPO)-i Eastern Nagaland nung 'public emergency' sangdonger.

March 5, 2024 nü Dimapur nung ENPO-i telok balala den külem senden ka amandang iba lemtet agia liasü.

Tanü senden nung February 23 Chenmoho bangzüng akangkanga inyaksü lemtet aser ibaji 'Central aser state elections kecha nunga shilem magitsüba" lir.

Senden nung adenertemisa March 8 nungi Eastern Nagaland kübok tesem ajanga mokdanga lungkak aittsü bangjemtepogo. Parnokisa

'public emergency' mapang Eastern Nagaland nung political party kecha nema election campaign meinyakdaksütsü lemtet.

India sorkar den Frontier Nagaland Territory metembangtetba atema tang teinyakdak ENPO ketdangpurtem ano maneni ita asem kümsük inyaka aotsü mapang atsülangtsügo.

Tribal presidents aser ENPO executive züngsem ka den February 23, 2024 nü Chenmoho yimtsüng nung ENPO constitution first amendment sayaba metongshitsü aser ibaji ksa anogo aser tesem amshia tanaben menüngshitsü lemtetogo.

Eastern Nagaland district 6 nem 'Frontier Naga Territory'

magütsüba atema tejashi nung ENPO-i February 10, 2024 nü district headquarters 6 nung public rally tem ayongzükba agia liasü.

Taküm Lok Sabha elections magidangsa Frontier Naga Territory tentetsüla ta parnok takhangba agütsür.

Election Commission of India-i MoS nung sign mesüi Election Model Code of Conduct sangdongba ajanga Eastern Nagaland region nung mepetmesü kar dang adokra onoki tebilemtsü khuret mabentsü ta ENPO-i metetdaksa liasü.

February 10, 2024 nü parnok Nagaland Governor La. Ganesan dang Union home minister Amit Shah dangi iba osang abentsü mepishia liasü.



### BJP Nagaland state tiri constituency ajunga semdangtsü



**Dimapur, Metsüremi/March 05 (TYO):** Bharatiya Janata Party (BJP) Nagaland State tir Benjamin Yepthomi-i March 4, 2024 nikongdang Guwahati nung Deputy Chief Minister & BLP Leader Yangthungo Patton - shiba Lok Sabha Prabhari In-charge of Nagaland - Rajya Sabha MP aser Lok Sabha Election Convenor Phangnon Konyak aser State General Secretary (Org) Manipur aser Nagaland State, Abhay Giri nung aserurua senden ka mena

liasiü. Iba senden ya aruya aliba Lok Sabha election dak sendakba maparen nung rangloker amen, kong party lenirtemi PDA candidate tashi ajak agi yaritsü nenshia ashi. Parnok ya Guwahati nung aliba BJP North East Padma Bhavan nung Manipur, Meghalaya aser Nagaland state indang Lok Sabha Committee meyokteper senden amenba nunga dena liasiü, kong BJP National General Secretary

(Org) BL Santhosh-i jembia aser North East Co. Coordinator & National Secretary Rituraj Sinha dena liasiü. Kasa mapang BJP Nagaland State tiri alliance partners den tesendaktep tali yanglutsü aser aruya aliba Lok Sabha election 2024 nung PDA candidate nem takok ngudaktsütsü mechi March 10 nungi tenzüka 60 (Mandal) Assembly Constituency Touring jajatsü, BJP Nagaland sangdong ka nung ashi.

### Dimapur nung Photo Exhibition sentong ali



*Dimapur Government College nung Photo Exhibition alidang Revenue Officer, Dimapur, Vinekho Tetso-i o jembiba noksa nung angur.*

**Dimapur, Metsüremi/March 05 (TYO):** Seva Sushasan & Garib Kalyan kum toku aser Systematic Voters Education and Electoral Participation (SVEEP) indang sentongtem temaba jenjangi ajungkettsü nukjidong nung Photo Exhibition sentong ka March 5, 2024 nü Dimapur Government College nung agia liasiü. Iba sentong ya Central Bureau of Communication, Field Office Kohima, Ministry

of Information and Broadcasting, Government of India ajanga ayongzüka liasiü. Iba sentong nung jembidang Asst. Prof. Department of Commerce, DGC, E. Lichumthung Kikon-i ashiba agi, electoral process ya India nung atema telungjem inyakyim tongtipangtiba lir. Election anogo nungya India nung aliba nisung ajak kasa akumer aser arishi kum 18 junger alirtem ajaki vote

agütsütsü temeden lir aser vote ajak tongtipang lir, ta pai ashi. Democracy nung tongshi ishika aliba nung vote agütsütsü temeden ya ka lir, anungji pei vote agütsütsü kanga tongtipang, ta ashi. Revenue Officer, Dimapur, Vinekho Tetso-i iba sentong nung jembidang, Narendra Modi lenisüba kübok maka mait aluyimer aser lanurtem nem tesenlok asoshi scheme balala agütsüo, ta ashi. Tanü lanurtem ya wadang balala nung sempet peria lir. Tesüba kum toku tsungta India nung sempet saya aser 'Nation-First' motto sorkar maparen nung tiyong südaktsü, ta pai ashi. Yashi mangdang tanü asangsang akumer aser India nung billion 1.4 tashi agi asenok tetsükdaktsü balala ajangeter, ta Tetso-isa ashi. Iba sentong tembanga P. Sophie, HoO, CBC Kohima ajanga melepzüng o jembia liasiü.



*Kekhrievor Kevichusa, Commissioner & Secretary to the Govt. of Nagaland, Department of Industries and Commerce, Kohima ajanga March 5, 2024 nü Handloom Exhibition sentong semzükja liasiü. Iba sentong ya Office of the Development Commissioner (Handlooms) Ministry of Textiles, New Delhi ajanga sponsor asü aser Nagaland Handloom & Handicrafts Development Corporation ajanga ayongzük, koba March 18, 2024 tashi alitsü, kong Assam, Arunachal Pradesh, West Bengal, Uttar Pradesh aser Nagaland kübok district balala nungi kija aser telok 60-i shilem agitar.*

### Dimapur nung nisung tasü mang ka nguteta lir

**Dimapur, Metsüremi/March 05 (TYO):** Railway Bazaar, Dimapur nung non-local nisung (tebur) ka tasü longdaka lir ta March 3, 2024 anügdang 11:30 ako meta Sub-Urban Police Station, Dimapur dangi osang arua liasiü. Iba osang angazükba nung ajemdaker duty party tem arsanga ao aser arishi kum 50-55 tsungta tain mejangjaba nisung ka tasü mang ngutet. Iba nisungba ya Hindu

nung asütsü südi ta temulung melemteti lir. Yangji ozüing agi melaba maparen ajak tembangba sülen tasü mang ya jangjatettsü aser PM examination atema District Hospital Dimapur Morgue nung bener oa lir. Kibur/kinunger mesüra tembar temi Officer-in-Charge, Sub-Urban Police Station, Dimapur den mobile number 7085055026 ajanga tongteprateptsü akok, ta sangdong ajanga ashi.

### Tseminyu nung EVM amshiyim training agütsü

**Dimapur, Metsüremi/March 05 (TYO):** Lok Sabha atema general election agütsü aliba dak sendakba nung 12th Tseminyu Assembly Constituency kübok Sector Officers aser Sector Commanders atema anogo ka orientation aser EVM hands-on training sentong March 5, 2024 nü Deputy Commissioner, Tseminyu indang Conference Hall nung agia liasiü. Iba sentong nung Deputy Commissioner & District Election Officer, Rohit Singh,

IAS ajanga Sector Officers aser Sector Commanders indang teinyaktsü mapa tem lemsatepa liasiü. Dr Sosenlo Kath aser Imtinuksung, DLMT, Tseminyu nungeri EVM hands-on training agütsü aser Hitilo Kath, DLMT Tseminyu ajanga Sector Officers aser Sector Commanders teinyaktsü indang lemsatepa liasiü. Iba sentong nung SDO (C) & Assistant Election Officer Tseminyu, Kemciyile, NCS menden liasiü.

### Advisor Keoshu Yimkhiung-i Sangphur nung Morung House semzüktsü



*Advisor, S. Keoshu Yimkhiung-i March 5, 2024 nü Sangphur yimdak Morung House semzüktsü dang tangokba noksa ka yangi angur.*

**Dimapur, Metsüremi/March 05 (TYO):** Advisor, Youth Resources & Sports, S. Keoshu Yimkhiung-i March 5, 2024 nü Sangphur Village, Shamator nung Morung House, Limtsang Awun Kheang Sangphur Sangkong Yam semzükja liasiü. Iba sentong nung jembidang, akhi mapang nungi yimtsüng asoshi Morung ya tongtipang aser Limtsang Awun Khel dang

maneni wazüka ayutsü ajungshi. Paise sobaliba tajung wazüka ayuba nung tajangzük aliba shisatsü lemsatepa liasiü. Iba sentong nung menden R. Thongshe liasiü, S. Mukam ajanga pela agizükba o jembia. Iba sentong nung K. Thongsomong P/Secy, K. Lakiumong, Hd. GB Sangphur aser K. Kehomong, P/Committee nungeria o tatsütsü jembia liasiü.

### Stenography indang training agütsü metetdaktsür

**Kohima, Metsüremi/March 05 (TYO):** District Industries Centre, Kohima nung session 2024-2025 atema Stenography ita 12 course agütsü atema jangra aliba candidate tem nungi General Manager, District Industries Centre, Kohima ajanga application meshir, ta sangdong ka ajanga ashi. Plain paper nung application den bio-data dener minimum educational qualification (forward tribe atema Graduate aser tema aser backward tribe atema PU passed aser tema) den nungdakba document tem attested sür agütsütsü ta ashi. Iba application ya March 22, 2024 tashinung agütsütsü.

Interview ya March 27, 2024 anepdang 10:30 ako nungi tenzüka General Manager, DIC, Kohima indang office chamber nung agütsü. Candidate temi interview mapang Educational/ Testimonial Certificates tem original bener arutsüla. Iba atema calling letter balaka magütsütsü mesüra TA/DA magütsütsü. Shimteta candidates tem nem ita shia stipend agütsütsü. Iba sentong ya self-employment atema dang aser training atema sülen job guarantee mali. Training ya April 1, 2024 nungi tenzüktsü, ta sangdong ajangasa ashi.





Chief Election Commissioner Rajiv Kumar aser tanga election commissioner tem aser ketdangsürtem taruba Lok Sabha election atema Kolkata nung osangbenertem den sensaksemba mapang tangokba noksa nung angur.

### PM Modi-i Bodhbarnü Agra 'priority corridor' lapoktsütsü

**New Delhi, Metsüremi/ March 5 (Agencies):** Ato Kilonser Narendra Modi-i Bodhbarnü Uttar Pradesh chief minister Yogi Adityanath den külemi Agra nung video conference ajanga Agra Metro indang 'priority corridor' lapoktsütsü. Iba metro section ya Uttar Pradesh Metro Rail Corporation (UPMRC)-i achaayanger, koba alima penzürtem atema Taj Mahal aser Agra Fort amala tongtambang tesemtem metro ajanga indang indanga sendakteptsütsü asoshi lir. Iba corridor lapoktsütsü sülen km 6 talang 'priority corridor' nung metro train inyaksangshi tenzüksü, koba Uttar Pradesh

Metro Rail Corporation Limited (UPMRCL) ketdangsürtemi ashiba agi, otsüsütsüsa kanga kara tembanga inyakogo. "Agra nung Taj Mahal, Agra Fort, Sikandra Tomb amala UNESCO World heritage tesemtem aika lir aser Agra Metro rail system ajanga alima penzürtem atema item tesemtem sendakteptsütsü," ta UPMRCL Public Relation Office, deputy general manager (DGM) Panchanan Mishra-i ashi. Km 6 talang 'priority corridor' nung ya station trok lir. Tema nung Taj East Gate, Shaheed Captain Shubham Gupta, aser Fatehabad Road Station ta station asem lir aser

Taj Mahal, Agra Fort, aser Mankameshwar station tem ali telung nung lir. Iba project ya 2020 küm December 7 nü tenzüka liasü. Project inyaksü atema senotsü ya European Investment Bank (EIB)-i tesadang agütsü aser tanungba ya state aser centre sorkar na kasasa lemdanga liasü. Agra Metro Rail Project atema sen crore 8379.62 intokogo aser priority section ya sen crore 2100 intoka yanglua liasü. Corridor atema ticket jenjang ya station kati aotsü atema sen 10, station ana atema sen 20 aser station trok nungi asem atema sen 30 asütsü.

### Gujarat nung Congress lenirtem BJP nung aden

**New Delhi, Metsüremi/ March 5 (Agencies):** Gujarat nung Congress lenir anati party toktsüba sülen Mongolbarnü Bharatiya Janata Party nung denogo. Congress lenir ana rongnung taoba state unit tekolakba Arjun Modhwadia densema lir aser tena ya state BJP tekolakba CR Paatil matsüngdang BJP nung dena liasü. Lenir ana den külemi party worker tem aika Gandhinagar kübok state headquarters 'Kalamam' nung BJP nung dena liasü. Gujarat BJP tekolakb CR Paatil-i, Arjun Modhwadia aser taoba Gujarat Pradesh Congress Committee working president Ambarish Der na pelashishia agizüka liasü. Lenir ana ya Hombarnü

Congress party nungi anena liasü. Tenati ashiba agi, January ita Ayodhya nung Lord Ram temple semzükba sentong nung shilem magitsü atema Congress party-i telemtetba agiba ajanga temulung mesüi tenati party toktsüogo. Rahul Gandhi-i aniba Bharat Jodo Nyay Yatra Gujarat-i aitsü anogo asem dang lia iba ya atalokogo. Der aser Modhwadia nati Congress party metoktsü tsüngda Rajya Sabha züngsem aser taoba Union minister Naran Rathwa den par jabaso aser parnok pusemertem aika BJP nung dena liasü. Modhwadia shiba Porbandar menden nungi lir, pai MLA ka ama pa indang resignation shiti Gujarat assembly Speaker

Shankar Chaudhary nem Gandhinagar nung Hombarnü nikonksütsü agütsüogo. Speaker indang office-i resignation agizükba jangjatsüogo. Modhwadia ya Gujarat nung yimden yimsüsürtem rongnung tejentiba ka aser opposition lenirtem rongnung ajak dang tongtibangtiba ka liasü, shiba Congress party den küm 40 shi sendaktepa aruogo. Pa ya opposition lenir aser state unit Tir liasü. 2022 küm election nung pai BJP lenir Babu Bokhria tsükdakja liasü. Chirag Patel aser CJ Chavda na December aser January ita mapa nungi anenba sülen Modhwadia ya taoba ita pezü tsüngda MLA mapa toktsüba Congress lenir tasembuba kümogo.



Bihar Chief Minister Nitish Kumar-i Patna nung MLC election atema nomination file asüba noksa nung angur.

### May 10 sülen India nunger sepai ka danga linük nung malitsü: Maldives Tir

**New Delhi, Metsüremi/ March 5 (Agencies):** Maldives Tir Mohamed Muizzu-i, India nunger sepaiem May 10 sülen linük nung ka danga malitsü ta nenshia metetdaksüogo. "May 10 sülen linük nung India nunger sepai ka danga malitsü. Uniform asemertem aser masemertem ka danga malitsü," ta Tir-isa metetdaksü. Maldives aser China na angati military teyari atema tenangzüktepba yangluba sülen Muizzu-i iba olen ya lemsatepogo. Maldives nung aviation sabang asem rongnung ka achaayangtsü atema India nungi civilian team ka February 28 nü Maldives tonga liasü. Linük ana tsüngda India nunger sepaiem anintsü atema tenangzüktepba yanglur lir. Muizzu-i February 5 nü mezüngbuba Parliament nung o

jembiba mapang March 10 matong tsüngda India nunger sepaiem meyipa yoktsü ta shia liasü. Maldives nung humanitarian teyari aser medical evacuation service agütsütsü atema India indang sabang asem amenoka lir aser iba ya achaayangtsü asoshi military personnel 88 amenoka lir. Local media sangdong balala ajanga ashiba agi, Maldives-i taoba hopta medical evacuation atema tayimtsü amshitsü asoshi Sri Lanka den tenangzüktepba ka yangluogo aser iba ajanga India nunger sepaiem kechisüdir süaka mintoktsü atema jenjang agiba sayur. Tangar dak memetaloki alitsü ya pai kanga tongtibangsa agir ta shia Muizzu-i, Maldives nungi India nunger sepaiem mintokba den linük anüolentiplen maritime tesemtem meyipa agitsü kanga tongtibang ta ashi.



Patiala nung 'Delhi Chalo' longkak aitba sentong nung shilem ka ama Centre sorkar anema longkak aitba mapang tetsür aluyimertemi shilem agiba noksa nung angur.

### Israel nung India nungertem tekümzükba tesem bushia aotsü tuyu

**New Delhi, Metsüremi/ March 5 (Agencies):** Israel kübok Margalioth nung orchard ka nung anti-tank missile ka agi Kerala nungi nisung ka tepsetba aser ana tashi yiruba sülen India-i Mongolbarnü Israel nung aliba India nungertem nem tetuyuba ka agütsüogo. "Tang security dak sendakba nung tensa mejungi aliba aser tetuyuba balala agütsür aliba dak ajemdaker Israel nung India nungertem aser talisa linük north aser south len mapa inyakertem mesüra arrtsü nung tesem balala semdangertem dang Israel telung nung tekümzükba tesem bushia aotsü tuyu," ta Indian Embassy-i X sabang ajanga metetdaksü. Indian embassy-isa, 24x7 helpline number i.e +972-35226748 ka lemsatepa liasü. ID: cons1.telaviv@mea.gov.in. ajanga embassy dangi email sütettsü. "Iba den bendenloksema Population and Immigration Authority of Israel hotline

number Tel - 1700707889 den tongteprateptetsü. Embassy-isa, Israel nung aliba India nungertem dang parnok indang local networks ajanga iba osang lemsateptsü mepeshia metetdaksüogo," ta embassy-isa shisem. Kerala kübok Kollam district nung alir Patnibin Maxwell ya orchard ka anasa aliba mapang anti-tank missile ka agi Israel indang arrtsü kongshia liasü. Pa tasümgang ya Ziv hospital nung yua lir. Ano Kerala nungi arishi küm 31 tain Bush Joseph George, aser arishi küm 28 tain Paul Melvin nata iba lendong nung yirur temang anepalutsü atema mozükidangi anirogo. PTI sangdong ka ajanga ashiba agi, iba tesem ya Lebanon nungi Shia Hezbollah teloki maka liasü. Hezbollah-i Gaza pusema October 8 nü nungi tenzüka Israel anütoktiplen temsem aser military post balala maka arudar. Israel aser Hezbollah na raratep tenzükba sülen civilian tenet aser IDF sepai 10 süogo.





## TIR YIMYIM YIMOBILEM (EDITORIAL)

DIMAPUR RASEMNÜ, MARCH (METSÜREMI) 06, 2024

### Opposition Tashi Nüngdak

- Tangsen Lemtur

India nung Congress party küm aika merena aruogo aser tang BJP merenba mapang. British nung yimsüsüba kübok India nung küm aika lir nüchiso anguba sülen Congress-i küm aika linük yimsü süa aruogo, aser tang BJP-i aniba NDA sorkari yimsü tesüdak lir; NDA sorkar kümsük (term) ana abensaogo. Yimtenren nung takutet lenirtemibo par telok tashi itdaksüba dang masü saka tanga yimtenren party tem jenjanga telungi idaktsür. Tamalen election nüboyimba sentong ka nung jembidang BJP Tir, Amit Shah-i, "Ozü party tongtibatiba onükji 'India nung Congress Party meshimeshi samatsütsü' lir" ta odiodia jembia liasü; yamaji parnoki Congress jenjang kanga mejungi kümdaktsüogo. Aji oda South India dak alaka tanünga India tesem ajak nung BJP junga yangertetogo. Tang north India nung aliba state 12 nungbo BJP sorkar lir, ajisüaka south India nungbo BJP tera meyangteter. Yaküm state pezü nung agiba assembly election nung BJP-i Rajasthan, Madhya Pradesh aser Chhattisgarh state tem nung takok anguba sülenbo tang India nung Congress-i yimsüsüba state asem (Himachal Pradesh, Karnataka aser Telangana) dang kümogo. Ano külen, tawa state 15 nung Rajya Sabha menden 56 atema agiba election nunga BJP-i menden 30 tashi nung takok nguteta liasü. BJP-i meimlaba menden ana nunga takok angu, aser ibaji Uttar Pradesh nung Samajwadi Party nungi MLA kari BJP nem vote agütsüba aser Himachal Pradesh nung Congress MLA tem kari BJP nem vote agütsüba ajanga liasü. Ibaji ajanga Himachal Pradesh nungbo Congress sorkar chireptsüsa anokshidakja liasü. Tang Rajya Sabha nung BJP züngsem 97 lir aser NDA teloktep nung aliba züngsemtem densemabo House nung parnok majority (menden 121) akümtsü atema menden pezüi dang mabensa. 2019 küm Rajya Sabha nung BJP züngsem 78 dang liasü saka BJP-i state balala nung agiba elections nung takok nguyonga aruba ajanga tangbo Rajya Sabha nung BJP MP 97 kümogo. Tang linük yimtenren tensa aser sorkari terenlok mapa junga inyakba apibo taruba Lok Sabha election nunga BJP-i aniba NDA teloktepisa takok angutsü; parnoki takok anguba dang masü saka opposition jenjanga kanga telungi idaktsütsüa akok. Joko küm aika tatartem senden (Parliament) junga magiteti aruba asenoki meteta dang lir. Parliament nung senden tiptema magitetba ya tang tasen masü saka tesüiba küm aika yamai dang arur. Ano taoksatsü kaji taoba Parliament nung opposition MP 92 tashi mongpu senden piyong atema anenja liasü. Parliament nung tongtibang onük aika süoka jembitsü meranger saka sorkari nokdang; iba ya ajanga democracy nukjidong mataloktsür. Nüburtem taküm jenjang tajungba kümdaktsütsü atema Parliament nung tatartemi mapang peria agia o lemteptsü nüngdak, aser tongtibang onük karbo Parliamentary aser standing committees nem agütsür, iba sülen ang telemtetba agia bill tem agizüker. Ajisüaka mapang peria agia o melemtepi tongtibang Bill tem agizüka arur. Kechi party sorkar menden nung lidir liaka nüburtem atemabo opposition tashi itta alitsüji kanga tongtibang, ajisüaka tang amai opposition tashi maitba-maitba dang kümra ibaji ajanga nüburtemsa akoksatsü.

## OLEMSABANG

### Asen sobaliba metsüngareta benshitsüla aser wazüka ayutsüla

- L.Kika Pongener.

Sobaliba ta asüba 'olong' ya asenoki tongmelang agi angatetsü atema, nisung ka tetsüpok nungi sor ina leperi mai tashi libaliroa aoba tang tatsü agi sobaliba ta ashitsü akok. Ajioda, sobaliba dakji achi-ajemba, subo-solemstü, oshi-oben, jaya-jako, nungja-koja, kibalembu, loktiliba, yar-tsüngsang, kenten-menu, külem-küja, benjong-bentsü, yimten-yimli, libaliro, anembong, ashibang, item ajungaji dena lir. Nisung shiba sudir suang, pa/la asodak yim ka lir, pa/la jakzüka aruba tsürabur aser kin-kidong ka lir. Nisung shiai...Ni ya shiba (?) Koyimer (?) Kütsü tenung shiba (?) Kübu tenung shiba (?) Kechi kidong (?) Kechi kin (?) Ibaji tejangja meteta alitsü tim. Nisung kati ibaji memetetra, pa/la dangji sobaliba metetba nisung ka ta ajatsü makok. Anungji shiba sudir suaka, pai/lai pei yim tenung tejangja metetsü tim, pei tsürabur shiba aji metetsü tim, kechi kidong aser kechi kin...aji tejangja metetsü tim. Kechiba sura, nisung ka iba lima nung sor ina libaliroa aotsü asoshi mezüngbuba sobaliba tera ayangdak kimong (Foundation)-ji pa/la koyimer (?) Kechi kidong (?) Kechi kin (?) Tetsü aser tebu tenung shiba (?) Tamasa ibaji metetsü kanga tongtipang lir.

Tanü putu nung tanür karbo tasoba tsürabur ka, saka tsürabur tanga kati tetsü-tebu kümer mesuba (Adapted) lir, balalular tanür, mesura kibong makümdang raksaba tanür karbo tetsü-tebou (Grant Father & Mother) kidang lia inteter, mesura kinunger sosem kari tsürabur kümer mesua inteter. Anungji joko shiri mesua intetdaksü par dangji tetsü-tebu jar, par kin kidong tenung agir lia arur...Kodang kibong akümtsü mapang atong, idangji tsürabur mechi nung aser kin-kidong mechi nung, timtem tetsükdaksü ajuruba-a aika ajangshia aruogo. Anungji shiba sudir suang, tsürabur taküm liaka aser taküm meliaka, pa/la shiba ajanga iba alimai aru, kechi kidong aser kechi kin, ajibo shidakbaji tejangja metetdaksütsüla. Ano iba dak alaka, pei tanür mesosemertemi, tangar tanür kar pei chir kümer mesuba (Adapted) ibala ya kanga kümdanga mesutsüla. Akok asübo pei kin tejangja tanür tang mesuba kanga agi tajungba sula. Tanü putu nung mapa tamajung inyakba aser tenung menuk bentsür aruba osang kakat-tem nung adokba ajak ya jungjunga bushidanga ora, teimba ka iba amala mesuba nisungtem ajanga yimtsüng aser kin-kidong tenung menuktsüba aiben tang ajangshia aruogo, kechiyong shitakba pei azü (Blood) agi akümba masüji teimba ka dak pei kin meimba shisatsüji keta malir.

Anungji shirnoki iba amala tanür bena arua pei chir kümer mesur (Adapted) kanga kümdanga azüoka sayutetsüla. Ajioda, shiba sudir suang, pa/la koyimer (?) Kechi kidong (?) Kechi kin (?) Ibaji tejangja metetdaksütsüla. Tanü putu nung Aor kibong ka nungi soa intetba chirnurtem suaka, teimba ka tanür tila asüdang nungi jila balala nung, Hostel nung tang lia inteter asünungji, pa/la koyimer-a tsüraburi jangja-jangja mesayura memetettsü. Mapang ka nung, Dimapur nung alir Aor chanu ka dang 'Na koyimer'...??? ta asüngdang nung...Dimapur nung ta langzüba lir. Shitakba nung tanür aika Dimapur nungang soa intet asünung, Dimapur nung ta ashitsübaji khen bilemstübo tim dang amai...Saka pa/la tebu shiba dak jakzüka iba yimerji asütsü...aji asen sobaliba. Anungji tsüraburtemi pei chirnur dang ibaji sayutsüla. Ano karbo tebu Aor suaka, tetsübo tangar kin, mesura Aor-sa suaka yim balaka asütsü akok...Item tanür kar dang 'Na koyimer'...??? ta asüngdang nung...Tanür karibo 'Tetsü' nung yim tenung ashiba lir. Anungji tsüraburi kibong ibaji kanga nendak-nendaka sayutsüla. Ajioda, yim balala, kin balala kibalembuba kibong nungi soa intetba tanürtem jagi, tsüraburi nendak-nendaka mesayura, pei taso yim aser pei kin tejangja memetettsü...Surabangla, pei kin oshi kodaser jembitettsü ...???

Anungji Aotsür Aor senso tajung kati pei kin sobaliba ayak tejangja metetsü aser mesamai wazüka ayutsü atema, kanga tongtipang amai bilemba kar, ni angazüka aruba nungi tongmelang agi kar iba ocet nung lemsatepnur. Tsürabur taintem aikati meteta dang lir, saka lanurtem atema kanga tongtipang ama bilemba agi kar lemsatepnur. Tongtipang aika dang lir, saka item rongnung kanga-sa tongtipang ama bilemba kar ni iba ocet nung lemsatepnur.


(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**



# Nepal nung pastor kati tepuokdak alitsü melen senchi menokner

Keshab Raj Acharya



**Kathmandu, Metsüremi/ March 05 (Agencies):** Tamangba yimsü melenba anema yanglua aliba ozüng kübok küm ka tepuokdak ayutsü Supreme Court of Nepal ajanga Pastor Keshab Raj Acharya nem totuyuba agütsür ita ka dak tali lir pai tepuokdak alitsü melen senchi ang menokner.

January 23 nung Supreme Court ajanga pa tepuokdak ayutsü obendang agüja aliba ama tepuokdaka alitsü totuyuba agütsü aser pai March ita tashi iba temerenshi memelentettsü.

"Police tem ni aputsü mashi mapang arutettsü. Ni Tsüngrem tenzüka lia parnok i aji inyaktsü," ta Pastor Acharya-i ashi.

Tamangba yimsü tsütsü dangar yimsü amangertem jashidaktsüba aser yimsü melendaktsüba atema November 2021 nung Dolpa District court ajanga Pastor Acharya ya küm ana tepuokdak ayutsü aser senchi sen 20,000 rupees (US\$167) achitsü obendang agüja liasü.

July 13, 2022 nü Jumla High Court ajanga iba ken o lepa reprangshi aser pai tamangba yimsü melendaktsüba nung aitsü aser tepuokdak küm ka dang ayutsü ajemtsü.

Alliance Defending Freedom International teyari nung pai iba obendang jembishitsü benok. October 6 nü Supreme Court-i iba ken o jembitsü memulung aser High Court indang telemtetba bhukuma liasü.

"Supreme Court nung tanaben ken o jembitsü temelaba mali ta kü dang ashi. Anungji High Court telemtetba jembitsü lenmang madoker, koba Supreme Court ajanga taoba mapang medentsü," ta pai ashi.

Dolpa District Court ajanga tepuokdak küm ana ayutsü aser senchi sen \$167 achitsü obendang agüja aliba High Court ajanga July 13 nü ajemja tepuokdak küm ka aser senchi sen \$75 achitsü obendang agüja liasü.

Okatsür aikati Pastor Acharya dang pa tepuokdak

ayutsü aliba melena senchi ang achitsü Dolpa District Court dang asüngdangang ta ashir aser pai iba mera agütsü, ta ashi.

"Saka ajak judge dak keta lir, pai melara ni merangtsü. Pai memelara, ni tepuokdak alitsü," ta Acharya-i ashi.

Pastor Acharya-i iba temelenshi atema masüngdang, kechiaser Dolpa ya temokong aser tezülen lir aser tang mapang ya ketdangsurtem tziüngsang-mopung talem alien aor.

Sarasadem agi novel coronavirus tanepsü angur ta pai osang tiazü prokshi ta aija March 2020 nung Pastor Acharya ya pua liasü.

Pokhara nung aliba Abundant Harvest Church nung pastor inyaksang ya kasa küm April 8 nü Nepal nung sen 5,000 (\$41) agütsür bail nung chioka liasü, saka danga tamangba yimsü amangertem temulung yirutsüba aser tamangba yimsü melendaktsüba ken o nung tanaben apu.

Pa bail nung chioktsü atema Nepal nung sen 500,000 (\$4,084) atet. Pa May 13, 2020 nung chiok, saka ano itangjisa pua Dolpa prison-i yoka liasü.

May 22, 2020 nung bail nung chioktsü memulungba sülen pa sen \$2,500 yong July 3, 2020 nung bail ka nung chioka liasü.

Iba sülen Dolpa District Court ajanga pa küm ana tepuokdak ayutsü asen senchi sen \$167 achitsü obendang agütsü. Pa November 22, 2021 nung apu aser kasa küm bail nung December 24 nü chioka liasü.

# Billy Graham tenu Jean Graham Ford süogo



Jean Graham Ford

**Charlotte, Metsüremi/ March 05 (Agencies):** Alimai kanga junga meteta aliba sayutsüngir Billy Graham adianutem rongnung tatemsaba Jean Graham Ford ya arishi küm 91 lia taoba hopta süogo, ta Billy Graham'er jabaso Franklin Graham-i Facebook post ka nung sangdonga liasü.

"Künü Jean-i Yisu Khrista, lar kibong, lar arogo aser alima tesem balala nung Tsüngrem nisung mapa meima liasü. La den la kinungbo Dr. Leighton Ford, tena ya kübo Tsüngremer wadang tepiyong ajungmesor tajung ka liasü. Pa takum aliba mapang ken o aika nung pai la

shisa agia liasü," ta Samaritan's Purse aser Billy Graham Evangelistic Association anisang Graham-i zülü.

"Künü Jean aser Leighton na Wheaton College nung ajurutepe. Küko Leighton ya tashi tait evangelist ka akum aser pa kinungtsüi pa yariba asoshi pela liasü. Laishiba nunga Tsüngrem angatetba tetsür nem tetushi agütsütsü langa lir ta shia lir."

Graham-i ashiba agi, tebu aser tenü tena tesendaktep tajung liasü. Frank aser Morrow Graham na chir pezü rongnung Jean ya tanutsü liasü. La ya Billy Graham dang küm 14 agi

tanutsü liasü aser lai teti Billy Graham dang "Billy Frank" ta aja.

Arishi küm 11 asüandang polio tashidak agi shirangba densema lanuwa timtem balala ajuruaka Jean-i Tsüngrem dak masetshie amanga liasü, ta pai ashi. La tanur asüandang asütsü metsübo, kechiaser la kotaki aotsü lai meteter liasü, ta Graham-i ashi.

"La tanur asüandang nungi Tsüngrem dak amanga liasü aser lar kibong nung Yisu lir ta ashi."

La takum kuli agi nisung aika dak kongshiba atema pelar aser ibaji kü mulung nung teti alir, ta ashi.

Graham-i Leighton Ford, par jabaso Kevin aser jala Debbie nung den asükhü lemsatep aser Jean Graham Ford takum junga litetogo, ta ashi.

Billy Graham ya arishi küm 99 lia 2018 küm asü, Catherine Graham McElroy ya arishi küm 86 lia 2006 küm asü aser Melvin Graham ya arishi küm 78 lia 2003 küm asü.

2018 küm Charlotte nung Billy Graham asüpila sentong nung Jean-i jembia liasü.

# ANOGO ABEN TSÜNGREM DEN

## Nenok Metsü

*Nenok alima metsü, saka metsü dak tanang samadokra, kechi agi aji nüngdaktsütsü? Joko aji kecha sütsü masü, saka endoker nisung tetsüng agi ajemshitsüba lir. Mathi 5:13.*

Tsüngremer nüburtemji alima wazüka ayurtem telok lir. Alima temenen agi raksaja aliba yanglushitsü aser kümzüka ayutsü asoshi Tsüngremi Khristantemji aja. Ne takümüjki lokti nung teraksa aliba endoktsü aser kechi shidak aser tajung lir aji wazüka ayutsü asoshi yok. Tanü lokti nung temeshi nisung ka alibaji kanga tongtipang lir. Ne dak Khrista aliba jagi tangar asoshi Khrista akaba ajak parnok nem kadaktsür. Pa tekümtet angati, teraksa kibong yanglushir, mejungi aliba anebtsür, lemang tezü nung alir agizüker aser temulung nung jashi alir süneptsür. Item ajakji na ajang ana meketa alir ajak dang Khristai Pa taküm sayur.

Saka asenok asen Kibuba den tesendaktep shidak melira Yisui ashi metsü dak tanang samadokba ama asenok alitsü, tagidak maka akümütsü. Tsüngrem taochi aser ain na ajanga tangar nem magütsütettsü. Asenoki asen taküm nung metsü tanangji koda tendangtsü? Asen kibong reprangang. Asenoki ibaji tamajung nungi wazüka yudar ma? Asenok mapa inyakdak tentangang. Asenok aliba ajanga tamajung teraksa sottar ama? Asenok lokti reprangang. Asenok atenba ajanga ibai tajungba kümdar ma? Asen arogo koda? Tsüngremi asenok amshiba ajanga tanelaren tajungba kümdar ma? Parnok tanelaren teraksa küma ora asenoki Kibuba dangi or parnok asoshi asen taküm amshiang ta asüngdangtsü akok.

# Megachurch pastor Michael Todd-i Tsüngrem o jembidang ku mejep

**Tulsa, Metsüremi/March 05 (Agencies):**

Oklahoma nung Transformation Church indang pastor Michael Todd-i Deobarnü Tsüngrem o jembibida mapang arogopur dang Tsüngrem nem yangludaktsüba ajanga pei takum nung süngjang tajung atanger ta sayutsü mechi ku mejepa pangsemo ongdoka liasü.

"Tsüngrem tenzüka ajanga anisüngzük angur ta angatetdakja taoba küm arogoi mapa tamajung inyak ta ashitsü ni aru," ta Todd-i ashidang pa indang ku mejeptsüri pa ku mejepa liasü.

"Tsüngrem dangi a rung aser nai tsüboa aliba ajak, nü nüktzü ajak pai suneptsütsü. Aser na kodang Tsüngrem dangi arudir temelaba akumer. Asenok anisüngzüka alitsü jangraba ajanga asenoki Pa senzüka yutsür ta ni shiner."

"Tsüngremi mah ta ashidang na merenshir ama nai bilemer. Nai sarasademba ama nai aginüba jenjang Tsüngremi memoatsüba ajanga Pai na ajepba mangashir ama nai bilemstü, saka asangsang nung Pai nü

sarasadem langzür saka nai memeteter, kechiaser na nübur peladaktsür ka ta Pai meteta lir aser nai aginüba jenjang ngutetra na yangji küm 15 malitsü. Aser tang nungi tenzüka küm asem tsüngta Pai na asoshi shidakba tia nai nüngdakba ama lapoktsütsü. Anungji Pai tang 'mah' ta ashiba ya Pa taginüba ka lir," ta pai ashi.

"Saka na anisüngzüka alitsü Tsüngrem dak nungi aginüra, na asoshi Tsüngremi yuja aliba nai mangutsü."

"Nai rongsen tsütsü anisüngzüka liner... budget ajemang. Nisung ajaki anisüngzüka aser jangratema liner, shingaia tajemzükba nung meliner. Aser iba sentong atemba mapang kü kolak tajungba kumer alitsü, kechiaser Pai tang aji ni asoshi inyaker," ta Todd-i ku mejeptsang athishia ashi.

"Pai ajitetba ama kü tekolak nung ku melenshitsür, kechiaser küsasa ni majiteter." Pei takum melenshitsü asoshi mapa aika inyaktsü, saka tatem nung Pa medeni kodanga shidak masütsü."



AO OSHI ANGAZÜKDAK: TANÜ ANGAZÜKTSÜBA OJANG



Soruchiok

(v) mi nung chiyongtsü renemba (cooking)

\* Tanü benjong nung awazürtemi kanga junga soruchiok.

Sorokmara

(Adj) sarongsaji, tajazü (clumsy)

\* Sorokmara nisungi junga soruchiok mesüteter.

OLONG PAITEP # 6718

Grid for Olong Paitep # 6718 with numbers 1-16 in various cells.

TIPIEN

- 1. O jembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzüik asendak - 5
14. Tsüngpang tema aliba - 5
15. Ken atenba yimya - 5
16. Asangur - 8

LANGTSÜNGLEN

- 1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjidong - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

OLONG PAITEP # 6717 TELANGZÜBA

TIPIEN :

- 1. Taa, 3. Teküm, 6. Aibelen, 7. Aut,
9. Ajizük, 10. Ojala, 11. Semer, 13. Sen,
15. Kioktsü, 17. Itsük, 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua,
5. Mitsüksü, 6. Azübenshi, 8. Lah,
9. Jangkok, 12. Akok, 14. Nashi,
16. Sür.

NAI-A YA METETTER MA



March 5, 2024 nü Guwahati nung aliba Krishna Kanta Handique State Open University (KKHSOU) indang convocation nung arishi küm 80 temapur nungi tepuokdak alirtem dena nisung 10,000 temai parnok degrees, diplomas aser PhDs nguogo.

Assam Governor & Chancellor Gulab Chand Kataria aser Central University of Haryana pro vice-chancellor Professor Sushma Yadava na adenba sentong nung nisung 10,880 nem degrees, diplomas aser certificates lema agütsü. Iba nung PhDs 13 dena lir aser takok angurtem rongnung 49% ji tetsürtem lir aser nisung 28 nem excellence in academics atema gold medals agütsü.

Assam kübok tesem balala nung aliba jail nung puoka alir nisung 7-i University nung academic programmes balala takok nguua züngtemogo. Parnok rongnungi Guwahati Central Jail nung puoka alir kati tanü convocation nung degree agizüka liasü.

Martin Irengbam-i Top Model of Universe nung tokteptsü



Guwahati, March 5, 2024

(Agencies): Assam nungi Gaurish Singh, Manipur nungi Martin Irengbam aser Assam nungi Krishna Das nungeri 13th Set Wet Mega Mister Northeast 2024 takoktem nguogo.

Set Wet Mega Mister North East 2024 ya March 1, 2024 nü ITA Cultural Complex, Machkhowa nung ayonga agi.

Taküm tetoktepba nung runners-up titles maliasü par asemprong winners ta sangoktsü aser prize packages o benefits kasasa dang agütsüogo.

Iba sentong nung Turkey nung Top Model of Universe

competition atema India tenüng nung tokteptsü nisung metetdaksü.

Manipur nungi Martin Irengbam nem Mega Mister India - Top Model of Universe korang semoktsü aser pai Top Model of Universe competition nung shilem agütsü.

Mega Entertainment-i pa atema preparation aser training sessions agütsütsü.

Mega Mister Northeast ya Northeast India nung tetoktepba tulutiba lir aser fashion entrepreneur Abhijeet Singha ajanga purapiteta agir. Iba sentong ya Mega Entertainment-i produce asür aser Mega Activation ajanga

marketing mapa inyaker.

Martin Irengbam ya Manipur University nung B.Sc. first year student lir. Pa tebu ya army lir aser pa tetsübo kecha meinyaker.

Krishna Das Cotton University Guwahati nung Mass Communication student ka lir. Pa tebu ya private sector nung mapa inyaker aser tetsü All India Radio nung inyaker.

Gaurish Singh ya Guwahati nung aspiring actor ka lir aser pa tebu business nung yariteper.

Par asem shia nem Rs. 50,000 prize package agütsüba den Set Wet brand ambassadors akümtsü maongka angütsü.

ECI telok kati Assam nung LS election atema semdang

Guwahati, March 5, 2024

(Agencies): Deputy Election Commissioner Hirdesh Kumar-i anir ECI telok kati Mongulbarnü Assam semdangi arua lir.

Parnoki anogo ana amongdang Lok Sabha elections dak sendakba nung senden balala ayonga amentsü.

Mongulbar anüngdang Election Commission of India (ECI) telokji Guwahati tonga aru aser Assam nung "free and fair" elections atema olemtep tenzüik.

"Deputy Election Commissioner Hirdesh Kumar-i anir ECI ketdangsürtem telok ka aruogo. Tanü parnoki Chief Electoral Officer Anurag Goel

asur State Police Nodal Officer Prasanta Kumar Bhuyan na den mezüngbuba senden amen" ta ketdangsür kati ashi.

Parnoki enforcement agencies den tanabuba senden amen aser idangji Model Code of Conduct (MCC) inyaksüba indang len sayu.

"Tanü atema tatebangba sendenji ECI team aser Chief Secretary Paban Kumar Borthakur, DGP Gyanendra Pratap Singh aser tanga tongti ketdangsürtem tsüngda amentsü. Iba mapang parnoki poll preparedness atema jembitsü" ta sorkar ketdangsürisa ashi.

Bodbarnü ECI teloki District Election Officers

(DEO) aser Superintendents of Police den ajurutepa senden amentsü.

"Assam sorkari ECI telok dang Rongali Bihu festival matongdang polling maparen tembangtsü mepishitsü" ta tanü Chief Minister Himanta Biswa Sarma-i ashi.

Assam nung sobaliba benjong tulutiba Rongali Bihu taküm April 13 nungi tenzüksü. Iba ya Assamese New Year tenzükba benjungmong lir.

Assam nung Lok Sabha MP14 lir aser parnok rongnung Bharatiya Janata Party (BJP) nungi MP 9, Congress nungi 3, All India United Democratic Front (AIUDF) nungi 1 aser Independent MP ka lir.

Arunachal CM-i kibong 96 nem land compensation agütsü

Itanagar, March 5, 2024

(Agencies): Arunachal Chief Minister Pema Khandu-i Shi Yomi district nung kibong 96 nem Rs 219.18 crore tashi ali melen temenok agütsüogo.

NEEPCO ajanga Siyom ayong nung 700 MW Tato II hydroelectric project yanglutsü atema iba teyari agütsü.

NEEPCO-i iba mapatong inyaker aser parnoki China den arrtsüa aliba Shi Yomi district nung alirtem nem maongka balala agütsütsü.

Tato II project den külemi taküm nungisa 240 MW Heo aser 186 MW Tato I projects tenzüksü.

Iba sentong nung Local MLA Mechukha cum Arunachal Pradesh Legislative Assembly Speaker Pasang Dorjee Sona, Shi yomi district Deputy commissioner Liyi Bagra aser NEEPCO ketdangsürtem aden.

Arunachal Pradesh nung mega hydro projects atema nübertemi ola adoker aser iba jagi NHPC (National

Hydroelectric Power Corporation)-i safety measures inyakba osang metetdaksüogo.

October 2023 nung Teesta Valley nung Glacial Lake Outburst Flood (GLOF) lendong atalokba sülen nisungtemi tsübuteper.

Subansiri, Siang aser Dibang ayongtem nung glacial lakes ji meta talang pilar China lushi nung lir anungji NHPC projects nung GLOF ajanga tüzümsüng lendong ajurutsü kanga ajema lir ta NHPC-i metetdaksüogo.





France indang constitution nung tetsür temi tanur raksa indoktsü asoshi temeden inoktsü bill ka agizüker Palace of Versailles, Paris nung March 4, 2024 nü pelatepba noksa nung angur. France nung abortion ya constitution agi melaba temeden ka Hombarnü kumogo.

### Black Sea nung Russia nunger indang rong ka raksatsü

**Kyiv, Metsüremi/March 5 (Agencies):** Black Sea nung drone amshia amakba mapang Russia nunger indang patrol ship ka raksatsüogo, ta Ukraine nunger itangitertemi sangdong ka ajanga metetdaksü.

Sergei Kotov, koba 2021 küm nungi amshia liasü, iba rong ya Mongolbar anepdang maka raksatsüogo.

Ukraine indang intelligence service-i ashiba agi, Black Sea nung amshia aliba rong ya tabelen aser tachichilen naprongla raksaogo.

Iba dak sendakba nung Kremlin-i kecha telangzüba magütsü.

Russia nunger pro-war bloggers kari iba rong amakaba indang osang jangjatsüogo.

Ukraine nunger intelligence ketdangsür Andrii Yusov-i RFERL broadcaster dang ashiba agi, rong nung alirtem kar asü aser kar yirugo.

Sergei Kotov ya Russia Navy indang Project 22160 atema yagluba patrol ship pezü rongnung ka lir.

Ukraine-i ashiba agi, 2022 küm February ita Ukraine amaka tenzükba anogo Snake Island amakba mapang Moskva cruiser den iba rong ya amshia liasü. Moskva rong ya Ukraine-i 2022 küm raksatsüogo.

Russia-i ozüing alema küm ter tejakdang Ukraine ket nungi Crimean peninsula atsüingogo. Ita ishika tsüingda Ukraine-i iba peninsula nung amendaker aliba Russia nunger indang rongtem

maka arudar.

Ukraine-isa, parnoki raksatsüba Sergei Kotov rong jenjang ya USD million 65 liasü, ta ashiba den iba rong ya Crimea aser Russia na lemdangtsüba Kerch Strait anasa raksaja liasü.

Social media nung lemsatepba video ka ajanga rong dak injang khaloktsüba mapang tangokba ama reprangtetogo.

Rara tenzükter Russia nunger rong 13 bo raksatsüogo, ta International Institute for Strategic Studies think tank-i metetdaksü.

Taoba ita Russia indang amphibious ship; Caesar Kunikov, Yalta jila anasa drone amshia raksatsüogo.

### Taoba Panama Tir Martinelli election nung metoktepdaksütsü



Ricardo Martinelli

**Panama City, Metsüremi/March 5 (Agencies):** Panama Electoral Tribunal-i, taoba Tir Ricardo Martinelli nem tenokdangba agütsüogo aser pa May ita agitsü aliba Tri election nung shilem magitetsü.

Iba telemtetba ya Hombar aonung Tribunal Tir Alfredo Junca-i sangdonga liasü, aser iba ajanga Martinelli election nung tokteptsü timla aliba samatsüogo. Taoba tir ya ochi mashi inyakyim balala dak sendakba nung taoba ita tepuokdaki aitsü aliba nungi jenbotsü merangba tamakok ngua Nicaraguan embassy nung jenokba sülen tang iba ya atalokogo.

Martinelli ya 2009 nungi 2014 küm tashi Tir liasü. Taoba küm pai publishing house ka nung

stake ka alitsü atema nüburtem dang nung auyaba sen amshiba nguteta liasü. Arishi küm 71 tain supermarket tycoon ya küm 10 tepuokdak ayutsü obendang agütsü aser senchi USD million 19 chia liasü.

Taoba ita pa nem obendang agütsüba anema ken o ka benokba Supreme Court-i magizük. SC-i iba jenjang agiba ya pa Tir election nung metoktepdaksütsü atema ajungbena jenjang agiba ka lir, ta pai ashi.

Pa nem tatembangbuba obendang agütsüba ajanga Electoral Tribunal-i iba telemtetba agiteta liasü. Panama temzüng ozüing kübok nüburtem shirnok küm pongu aser tema tepuokdaki yokdir parnok elected office abentsü

memelar.

Martinelli nem iba tenokdangba magütsü tsüingda poll timba kati pai election akoktsü ta takzür liasü.

Martinelli shiba legislative menden ka asoshi tokteptsü atema tenokdangba agütsü liasü, pai pa kecha nunga aibelena mali ta shia arudar.

Pa sübokrem agiba, nüburtem indang rongsen ochimeshi amshiba amala ken o balala nung aija bushisüingdangdar.



Indonesia yimtiba Jakarta nung aliba parliament jakdang nüburtemi zülu balala bener longkak aitba noksa nung angur. February 14 tir election nung tim masüba mapa inyak ta tai tonglokja aliba mechi nüburtemi Indonesia Tir Joko Widodo atsüingdoktsü takhangba agütsü longkak aiter.

### SANGDONGER

Süingdong-lu ayimertem atema agütsü aliba Nursery Farm nungi süngdong (Saplings) angutsü.

- 1. Pine (three types)
- 2. Kisamen (Kokon)

**SHIM KI MPCs,**  
Nursery Farm,  
Marepkong ward, Mokochung  
Contact No : 9862127345

### US-i Zimbabwe Tir Emmerson Mnangagwa nem tenokdangba agütsür

**Washington, Metsüremi/March 05 (Agencies):** Ochimashi mapa inyakba aser human rights abuses nung shilem agiba mechi United States-i Zimbabwe Tir Emmerson Mnangagwa, pa kinungtsü aser sorkar ketdangsürtem nem temerenshi agütsüogo.



Emmerson Mnangagwa

2003 nungi amshia aruba sanctions programme tanaben lepa reprangshiba sülen US Treasury's Office of Foreign Assets Control ajanga Mnangagwas, Vice President Constantino Chiwenga, aser retired Brigadier-General Walter Tapfumaneyi densema nisung 11 aser company asem dak tenük yoker temerenshi ya sangdonga liasü.

Hombarnü sangdongba nisung tenüngtem dak alika taoba mapang US sanctions nung aliba Zimbabwe nungertem nem tenokdangba agütsü aliba agientsü.

"Tanü onoki temelenshi yangluba ya teti ochi aliba tejanga kumdaksütsü nükjidong nung lir: onoki sanctions agütsüba ya Zimbabwe nüburtem dak tenük yoktsü nükjidong nung masü," ta Deputy Treasury Secretary Wally Adeyemo-i ashi.

"Onoki tejanga targets nem sanction agütsür: Tir Mnangagwa indang sorkar ketdangsürtem aser shishilempar temi ochimashi mapa inyak aser Zimbabwe nübur anema meimchir temeden meshidaki amshi," ta pai ashi.

Mnangagwa ya Zimbabwe nung hon aser diamond shibelener tem kumzüka ayur aser sorkar ketdangsürtem dang

item senti oset ya ozüing kübok maliba shishilempadak ayoktsü lenmang sayutsü aser iba melen süpokrem agitsü totuyuba agütsü ta aitsür.

Taoba küm al Jazeera ajanga bushisüingdangba nung Zimbabwe sorkari 'smuggling gangs' amshia sen dollar million aika jenjang hon ayoker ta ngutet. Zimbabwe-i bendang lima balala nung belena ayokba osettsüsettem rongnung hon ya timba lir.

"Zimbabwe sorkar nung züingsemtem densema tongtipang nisung temi sorkar senpong nungi auyar aser nüburtem tim atemer," ta US Secretary of State Antony Blinken-i ashi.

"Nisung pua bener aoba, züka merenshiba, aser nisung tepsetba ajanga nüburtem tetsübo nung alir."

Mnangagwa ya taoba küm August ita elections nung takoker sangdong, saka international observers temi democratic yimya mamshi ta ashir.

Mnangagwa-i shiranga alisang Robert Mugabe ya tir menden nungi 2017 küm atsüingdok. Mugabe ya küm ana sülen arishi küm 95 nung asü.



## Praneeth asaya nungi anenba sülen coach mapa atema US-i aotsü



B Sai Praneeth

**Jaipur, Metsüremi/March 5 (Agencies):** United States nung tang India nunger badminton coach kanga aginüba mapang ka lir aser Shlok Ramchandran sülen B Sai Praneeth aser Mohammed Siyadath Ullah nata US-i yakta aotsü.

Sai Praneeth, North Carolina nung Triangle Badminton Academy nung adentsü aser Siyadath, Oregon Badminton Academy nung adentsü.

Taoba mapang tarep asayar Shlok ya küm asembuba Synergy Badminton Academy, California nung main coach lir. Taoba küm Washington nung 23buba BWF World Junior

Championships asayaba mapang Shlok ya US coach liasü.

Tokyo Olympian Sai Praneeth-i pa badminton asaya nungi anenba Hombarnü sangdongogo. Arishi küm 31 tain Praneeth mapang tatsüka tsüingda mapa tasen agizüktü atema par kibong den külemi US-i aotsü.

"Temulung shiranga ni küm 24 tashi asaya aruba asaya nungi anenba osang sangdonger. Ni jenjang tasen ka agiba mapang iba jenjang tongtetba atema kanga dang pelar," ta Sai-i Hombar nikongtsütsü social media ajanga pa tebilemba lemsatepa liasü.

Taoba mapang world No. 10 asayar Sai-isa, pa tanenmakai nongita yariba atema par kinunger aser chief national coach Pullela Gopichand nunger dang kanga pelaba lemsatepa liasü.

"Ni tanenmakai nongita yariba atema kü tsürapur aser kinungtsü Swetha dang kanga pelar. Maneni Pullela Gopichand aser Gopichand Academy nung coaching aser support staff ajak ang kanga pelar," ta Sai-i ashi, shiba lanuwa nungi Gopichand-i aniteta liasü.

2019 World Championships bronze medalist yagisa pa tanur asüding coach SM Arif aser Govardhan Reddy na danga kanga pelaba lemsatepogo.

Sai aser Siyadath naprongla Hyderabad nung amendaker aliba Gopichand Academy mapang ka nung toktsür oaka tena US nung training centre balala nung adentsü. US nung badminton asaya kanga kara renloka odar aser asaya jenjang ajungkettsü atema bendanger coach tem aika anisemdar.

Siyadath ya taoba küm 20 shi Gopichand den inyaka aruogo. Pa Hyderabad nung Gopichand Academy lapokba mapang nungi liasü.

Source ajanga ashiba agi, Sai Praneeth aser Siyadath naprongla coaching contract tajung nguogo.

## Hundred asayamung atema Warner aser Lanning la draft süogo



Meg Lanning



David Warner

**Metsüremi/March 5, 2024 (Agencies):** Australia nunger nungtu asayar Meg Lanning aser David Warner na 2024 The Hundred draft nung international asayartem rongnung densemogo.

Warner iba asayamung nung khien danga asaya mali, saka Lanning bo 2022 küm Trent Rockets nungi asayaogo.

England nunger asayartem rongnung Ollie Pope, Dawid Malan, Jason Roy aser Amy Jones nungera densema lir aser iba asayamung atema asayartem March 20 nü shimtsü.

The Hundred 2024 ya July 23 nü Oval Invincibles aser Birmingham Phoenix na asaya

tenzüktü.

Tetsür aser tebur tetoktepba nung asayar 75 draft asüba sülen shimtsü aser team 16-i asayar 137 bo meyipa agiogo.

2023 küm ponglang nung tembangba team temi asayartem tama shimtsü. Tetsür asaya nung Birmingham Phoenix aser tebur asaya nung Northern Superchargers pur ponglang nung liasü.

Lanning ya Australia team nungi küm 13 asayaba sülen taoba küm November ita international cricket asaya nungi anenogo.

Warner-a Test aser ODI asaya nungibo anenogo, saka tang tashi T20 asaya nung Australia tenüng nungi

asayadar.

Kasa mapang nung India tsür Smriti Mandhana, Jemimah Rodrigues, Deepti Sharma aser Richa Ghosh nungera shimmer lir.

New Zealand captain Kane Williamson, West Indies all-rounder Kieron Pollard aser Australia nunger batter Beth Mooney nungera draft nung züngoksema lir.

Tetsür team tem nem asayar ti aser tebur team tem nem asayar 10 meyipa agitsü atema temelaba agütsüogo aser tanungba asayartem ya draft asüba sülen shimtsü.

Tetsür aser tebur team ajaki bendanger asayar asemsem shimtetsü.

## French Open: Rankireddy- Shetty aser Jolly-Gayatri nunger 2buba round-i iogo

**Metsüremi/March 5, 2024 (Agencies):** French Open Super 750 badminton asayamung nung India nunger nungtu asayar Satwiksairaj Rankireddy aser Chirag Shetty nati Mongolbarnü kanga meranga asayar Malaysia nunger tarep Ong Yew Sin aser Teo Ee Yi na kokogo.

World no. 1 tarep Satwik aser Chirag nati iba asayamung ya 2022 küm kokogo. Asian Games champions yagi Mongolbarnü iba asayamung kanga junga tenzüka world no. 12 Malaysia nunger tarep 21-13 24-22 agi minute 47 nung koka liasü. Tarep ana tsüingda tang tashi nung tiben asayaogo aser India nunger tarep yagi ponguben kokogo.

Satwik aser Chirag na taoba asayamung asem tashi tanabuba jenjang nung tembanga liasü aser tena tanabuba round nung ano

Malaysia nunger tarep Man Wei Chong aser Kai Wun Tee na den asayatsü.

Kasa mapang nung Commonwealth Games bronze medallists Treesa Jolly aser Gayatri Gopichand nati tetsür tarep asaya mezüngbuba round nung külem India tsür Ashwini Ponnappa aser Tanisha Crasto na 16-21 21-19 21-17 agi koka tanabuba round tongtetogo.

Tena Paris Olympics atema qualify asütsü asoshi meranga asayaba mapang ka lir. Olympic Games qualification ranking nung Tanisha-Ashwini na 11buba aser Treesa o Gayatri na 14buba nung lir.

Treesa aser Gayatri na tang kanga junga asayaba mapang ka lir aser taoba ita Shah Alam, Malaysia nung India tetsür team-i otsütsüsa Badminton Asia Team Championships akokba nung tenati tongtibang shilem agia liasü.

## Doug Watson Scotland cricket team head coach kümogo



Scotland team T20 World Cup asayatsü, kong parnok group stage nung England, Australia, Oman aser Namibia den asayatsü lir.

"Ni tanaben denshiba atema kanga pelar. 2023 küm jangradema inyakogo aser asayar aser staff tem den mapa inyak tenzüktü yongya atar," ta Watson-i ashi.

"Ni Edinburgh yimti aser Scotland nungertem meimer aser asayar tajungtem den inyaktsü aser Scotland tenüng nungi asayatsü atema parnok temulungtetba aser tejangraba ngua ni meyipa arutsü telemtetba agi.

"Tebur team ya kanga tajung aser onok külemi mezüngbuba Zimbabwe nung aser iba sülen T20 Qualifier nung jangradema asayaogo.

"T20 World Cup atema kanga meranga inyaktsü aika lir, saka asaya tajung kar asayatsü atema yongya atar.

"Onok England aser Australia na den aser ano Namibia o Oman den asayatsü lir, anungji asaya kanga melarabo masütsü, saka onok tejangraba aser sempet sayutsü atema iba ya maongka tajungka ama onoki agir," ta pai ashi.

Watson ya taoba mapang Mumbai Indians, Wellington, Kwa-Zulu Natal Inland aser Namibia nung coach mapa inyakogo aser iba den pa 2023 küm England den Test asayaba mapang New Zealand indang batting coach liasü.

**Metsüremi/March 5, 2024 (Agencies):** South Africa nunger Doug Watson, taoba küm interim coach ama kanga takok ngua inyakba sülen pa Scotland tebur cricket team head coach kümogo.

Pai coach mapa bener aliba mapang Scotland team-i ICC World Cup qualifier nung Ireland, UAE, Oman, West Indies aser Zimbabwe kokogo.

Iba sülen parnoki T20 World Cup Europe Qualifier koka taküm West Indies aser United States nung asayatsü aliba T20 World Cup atema qualify süogo.

Arishi küm 50 tain yagi iba mapa April ita agizüktü, kechiyong pa tang Auckland indang coach mapa tinyakdak lir.

Pa 2022 küm June ita nungi Auckland Aces' indang coach lir aser pa lenisüba nung parnoki New Zealand indang domestic T20 title benogo, taküm Super Smash kokogo aser the 50-over Ford Trophy nunga final tonga asayaogo.

Watson, shiba taoba küm Shane Burger Somerset-i aoba sülen Scotland coach ama inyak liasü, pa lenisüba nung

## BILEMDANGANG

"Ajaki tako nguner saka kari dang takok asoshi renemer."